

**AÑ PUEPAÑ SAN PABLO
PO' CARTA ÑEÑT
QUELLQUËRRANERR
CORINTO' MARNESHA'
2 CORINTIOS**

Atto Pablopa' alla quellquërranerr carta añecop ñeñt ame'ñetsa anetso Corinto

¹ Masheñneshacha' ñaña nochaneshacha' ñeñtes allohuenes ame'ñenaya Yompor ñaña e'ñe same'ñeñoť chocma sapčhena Yomporecop all anetso Corinto. Ñaña añ cartapa' añepa'ñaña nequellquëñ allohuenacop ñeñt o' pueyochresha' perranet Parets ñeñt apčha'yetsa allemeñ anetso Acayo'mar. Na Pablón o'ch alla nequellquërrnaserr po'poñ carta epan masheñ Timoteo. Napa' ñeñten Jesucristo puellsensaren tarro'mar atet muenen Yompor.

² Te'pa' e'ñe nehuomčha'teñoťes sa napa' o'ch notas: Yomporepa'chña sebensare'tampene' ñeñt nanac Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyočhro allohuenes.

Yomporpa' ñachña chocma yocshatene' allempo es yehuenoya

³ Aye'chočhtaterrapo'ch Yompor, ñeñtara ñeñt Pompore pen Yepartseshar Jesucristo. Ñeñtara Yompor ñeñt atarr amueraña, ñeñtcha' chocma yocshaterre' allempo es yellcatene' yeyočhro.

4 Ñerra'm esempo huennaya pa'namen ñeñt amuerochtatañtetsa ñapa' ñachña chocma yocshaterre'. Tarro'mar o' coshaterrey Yompor, allochña yapa'cho'ña attoch yeñoteñ o'ch yocshater yaña masheñnesha' ñerra'm esempo huapanet ñamet ñeñtcha' muerochtatahuet. Añ poctetsa o'ch yocshaterranet ñet atto Yomporpa' o' coshaterrey yaña.

5 Atto nanac yemuerochtapreteña Cristo tarraña ñachña ello atarr yocshaterre'.

6 Ñeñto'marña te'pa' o'ch notas, ñerra'm esempo nemuerochtena na, ñeñtpa' e'ñe po'ñoçh socop, tarro'mar ñerra'm esempo nemuerochtena napa' ñeñtpa' alloch socsherra samã attotcha'ña sequeshperra. Ñaña ñerra'm esempo coshaterren Yompor ñeñtpa'cho'ña alloch nocshaterres samã. Allochñapa' e'ñe socsheñeshocmañen chocmach sa'huanten allohuen muerochteñets ñeñt atet nepena na.

7 Ñeñto'mar napa' neñotenes chocmach sa'huanta' ñeñt echarr senten. Tarro'mar napa' neñoteñ ñerra'm allpon semuerochtapretna, elloña allempopa' o'ch alla e'ñe socshapreterrna atto Yomporpa' ñachña chocma yocshaterre'.

8 Ñehua, te'pa' nemneñ o'ch masheñneshacha' señoten ñeñt atet nemuerochtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach errof nepe o'ch na'queshpata nañeña.

9 Po'ñoçh napa' neñoteñ neyoçhro te'pa' o' çhaponã ñeñt nocop allempoch nerroma. Tarraña añecpa huapona echarrteñets atet, allochñapa'

attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencoť ama't arromñaťpa' čhocmach tantater.

¹⁰ Tarraña ama't muene' nerromañ Yomporpa' allorocma tantaterren po'huamencoť attoch ama nerromo. Ñeñto'marña napa' neñoteñ Yomporpa' čhocmach a'queshpaterrey. Ñeñto'marña te'pa' ñachña čhocma neyemtena. Neñoteñ allo'na sen na'queshpatnene' ñerra'm esempo es nohuerroyerr ñeñť atarr echarr.

¹¹ Naña añ poctetsa o'ch sema'yocham̄penna attoch seyenpa'n. Naña shonte' acheñenesha' ñerra'm esempo eñotennet atto Yomporpa' čhocma a'natenna e'ñe puema'yocheñoťet ñet, allempopa' čhocmach parasyoso'teñet Yompor atto a'natenna.

Atto Pablopa' ama eñotenano pueshquēñ

¹² Nehua, te'pa' o'ch notas po'poñ ñeñť atet noctape'chen. Napa' ñeñťña atarr nocshatene' nanac. Napa' neñotena neyočhro po'ñoč arr patsropa' čhocma noctape'chen ñeñť atet pocte' enten Parets. E'ñe name'ñeñoť Yompor, napa' ama nemno o'ch esesha' neshca'yes ama't mamesha. Elloña sapa' ama nemno o'ch neshcas ama't e'ñe mamesha. Ama ña neyemteno ñeñť atet yoctape'chen ya acheñey arr patsro, añcha'ña neyemteñoť Yompor attoch ñach neyenpuene'. E'ñe puemuereñoť ñachña neñotatene' ñeñť cohuen enten ña.

¹³ Nehua, sapa' čhate' sotapañ napa' attate' neshquēnes ñeñť notenes necartot. Tarraña

ñeñt allpon notenes necartotpa', o'ch selleye' allochñapa' esheccha' señoçh ñeñtpa' e'ñe po'ñoçh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señoçh ñeñt atet notenes necartot ñeñtpa' e'ñe po'ñoçh atet. Napa' ama çhoye' neshquënso.

¹⁴ Ama't te'pa' ama e'ñe poctacmaye' seyemtenno, ñarraña ñerra'm seyemtenna e'ñe poctacma, allempoñapa' ñerra'm esempoch huerra Yepartseshar Jesúsapa' atto socshenna na, napa'çho'ña allempopa' nocsherrsach saña.

Atto Pablopa' sechenañ o'ch emo'tenana' cor-into'marnesha'

¹⁵⁻¹⁶ Napa' notenapañ çhocmate' seyemtenna, ñarro'mar napa' ama çhoye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonio'tpa' o'ch alla nemo'tnerrserr. Attoch puepocheño o'ch nocshatterres, ñaña attoch seyepa'n saña o'ch alla ahuerren Judeo.

¹⁷ Tarraña ama't atet noctape'cheneñ o'ch nemo'terrsaña' ñarraña ama neseno o'ch nabçherrsas'; ñeñto'marña sapa' çhate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es pueçhena arr patsro. Ama'tcha' otenan acheñenesha' ñeñtcha' atet pa, tarraña pueyoçhroñapa' cotape'chenayach po'poñ.

18 Tarraña napa' ama atteye' noctape'cheno. Ñerra'm es notenes ñeñtcha' atet neřapa' neyočhroñapa' ama esoye' noctape'cheno po'poñ. Tarro'mar Yompor ñerra'm es oteney ñeñtcha' atet řonaypa' atetcha'cho' pennay tarro'mar ñapa' ama puenesho po'ñoñ.

19 Ñaña Yompor Puechemer ñeñtara Cristo Jesús ñerra'm es oteney ñeñtcha' atet řonaypa' atetcha'cho' pennay, čhocmach orrtateñ e'ñe po'ñočh, tarro'mar ñapa'cho'ña ama puenesho po'ñoñ. Ñeñtara Jesucristo ñeñt čhocma yeserrpare'tatenes epan masheñ Silvano ñaña masheñ Timoteo.

20 Tarro'mar allohuen ñeñt allpon atet oteney Yompor ñeñtcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompore po'ñoñ yocop. Allochñapa' attoch e'ñe cohuen ya'ye'chočhtateññañ Yompor.

21 Ñeñtara Yompor ñeñt ahuamencať pene' allohuene yeyočer e'ñe yame'ñeñoť Puechemer Cristo. Ñeñtara Yompor ñeñt yellsensene' attoch yetorra'yesa ñocop.

22 Ñaña ñapa' ahuo't apuerrey attoch yeñoter o' puechemer perrey ña. Ñeñtpa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquēñ ñeñtcha' yečherrtsa yeyočhro ñeñtpa' ñeñtcha'ña yeñotatene' orameñ shonte' ñeñt o'patatenya Yompor.

23 Te'pa' o'ch neñotaterrerr ñeñt atet noctape'chen ñeñto'marña ama nemo'terrso ahuaña. Yomporpa' eñotenen ñeñtcha' atet notas ñeñtpa' e'ñe po'ñoçh atet. E'ñe nemorrenteñoñes sapa' ama neçherro all seyçhena Corinto. Tarro'mar ama neto, ñerra'm netañ o'ch neçhap seshopa' çhate' muene' neche'ptare'tyesoses e'ñe sa satpare'teñoñen. Ñerra'm atetpa' çhate' alla nellcaterres. Ñeñto'mar te'pa' o'ch notas e'ñe nemorrenteñoñes sapa' attotña ama neçherro sesho. Ñerra'm po'ñoçhte' ama atteye' notensopa' Yomporapa'chña na'chencaterre'.

24 Ama añecpaye' notenso attoch sapa' o'ch sa'mcha'tareter seperren na, ñeñtes ame'ñenaya Yompor. Añcha'ña netorrapretasa attoch neyenpas. Ama't atto o' huomenc same'ñeñañ Yompor, napa' çhocmach netorrena socop allochñapa' attoch señañeshocmañen soçter Yompor e'ñe poçtasma.

2

1 Ñehua, ama'tcha' nemneñeñ o'ch alla neçherrerr sesho tarraña napa' ahuo't alla noctape'cherr ello neyoçhro, noten amach neto tarro'mar ama nemno o'ch neçhap nellquëñsha' sesho te't sapa' o'te' alla nellcaterrerr sanña.

2 Tarro'mar noten ñerra'm ne'ñotare'teñoñes na o'ch alla nellcaterrespa' attoch nellcaterres sa, selquëñapa' amach nocshapretaso, tarro'mar sapa' sañeña e'ñe nocshatene'.

3 Ñeñto'marña ama neçherro sesho ahuaña, añe nequellconas carta ñeñtcha' soçtape'chaterre' e'ñe cohuen. Allochñapa' ñerra'm machayoña

necherr sesho ñerra'm o'ch alla soctape'cherr cohuen, ñeñtcha'ña atarr nocshapretuerrsa. Allochñapa' amach tama nellquënso tarro'mar añ poctetsa socop chocmachña e'ñe socshaterren. Ñaña neñotenes ñerra'm esempo nocshena na sapa'cho'ña allohuenespa' o'ch e'ñe socsherra.

⁴ Ñaña allempo nequellconas añ carta ahuañapa' e'ñe nellquëñsha' nequellquënnas. Ama neñmateno neyo'chro ama't mamesha, e'ñe ñeñta nenen neyo'chro. Elloñapa' e'ñe neya'chpeñsha' nequellquënnas ñeñt carta. Napa' ama añecpaye' nequellquënnaso carta attoch nellcatas sa; añecpaña nequellquënnas attoch sapa' o'ch seño'ch atarr nanac nemorrentensa.

Arrpa' all cotape'chatanet attoch peretnet atparñañ

⁵ Ñaña añ acheñer ñeñt atpare'tetsa seshopa' ama naptayaya llecatenno na, añña ama't sapa'cho'ña allohuenespa' chocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atta atarr natontaten ñoñets ñeñt ama atteyaye po'ño'ch.

⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchatererr ñeñt atparñañ, tarraña te'pa' ñeñt'ach.

⁷ Te'pa' añña poctetsa o'ch alla sepretner, allochñapa' attoch socshater, te't atta nanac llequëna, puellquëño'tpa' o'te' alla que'chpuerran Yompor.

8 Ñeñto'mar te'pa' notenes añ poctetsa o'ch sorrtaoñ cohuen ñocop attoch eñoter po'ñoçhpa' atarr semorrenteña.

9 Ñeñtecpaña noctape'chatas ahuaña necartoñ ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ñoçhte' e'ñe same'ñena ñeñt poctetsa Yomporecop, ama't erroteno'tsensa.

10 Ñaña o'ch noterrser, ñerra'm esesha' sepretnerr sa, napa'cho'ña e'ñech pocte' nenteñ ñaña apretnaretterrepa'ch. Ñeñt chocma natpare'tene' ahuaña te'ña ñapa' o' nepretnerr, ñeñtpa' e'ñe socop. Ama't Cristopa' e'ñe entenen.

11 Ñaña añ e'ñe poctetsa o'ch yepretnannena. Allochñapa' ama't oneñetpa' amach alla a'psaterrye Yompor. Tarro'mar ñapa' yeñoteñ chocma e'nenan attoch shequëney.

Atto Pablopa' atarr llequënana corinto'marnesha' allempo ama huerra' Tito Corintot

12 Te'pa' o'ch neñotaterrser ñeñt atet neña ahuaña. Ahuaña allempo necherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ,

13 tarraña napa' ama't mamesha ama neñmateno neyoçhro tarro'mar allpa' ama nentose masheñ Tito. Ñeñto'mar ama na'po all, atta neso'tnerranet, o'ch necherr all anetso Macedonia.

Yomporpa' chocma moñenya allempo es yehuenoya

14 Yeparasyoso'chepa'ch Yompor tarro'mar ñapa' chocma moñenya allempo es yehuenoya. Ñaña e'ñe yeyemteñoñ Puechemer Cristo Jesús'pa' chapaterreycha' cosheñtso. Ama't yapa' o' muenaterrey attoch ya'poterrñañ po'ñoñ errañaren, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrrate' ñeñt atarr es eñmosa'ttetsa, chach epa'hua e'ñe cohuen erracmañen pue'ñmosa'tteña.

15 Tarro'mar ñeñtey a'potene' Cristo, Pomporñapa' e'ñe atet enteney ñerra'mrrate' ñeñt eñmosa'ttetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeño'tetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'.

16 Acheñenesha' ñeñtcha' chenquërrtsapa' e'ñech atet enteññañet Yompor po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosa't ñeñtcha'ña ya'crraterre' errponohuañen. Esha'huachñaca' pocte' enterrña Yompor ñeñtcha' serrpare'terre' po'ñoñ.

17 Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama choye' yetseteno Yompor po'ñoñ acheñ

poctaṗño ñeñt̃ atet̃ pena shonte' po'potantañ
acheñenesha'. Ñetpa' atet̃ penet̃ attoch pocshateñoñ
acheñenesha'pa' o'ch es apa'yenanet. Añcha'ña e'ñe
yeñmañeshocmañen yeserrpare'teññañ po'ñoñ
atet̃ llesenseny Yompor. Ñapa' enteney ñeñt̃
atet̃ ye'ñorena ñocop e'ñe yeyemteñoñ Puechemer
Cristo.

3

*Atto Pablopa' ama pallteno o'ch quellcoñet carta
attoch cohuen enteñ acheñenesha'*

¹ Sapa' čhate' sotenapañ napa' o' alla
neñerrerr e'ñe cohuen, ñato' nocpate', ñato'
čhate' nommo'chena. Tarraña ñeñt̃pa' ama
atteyaye. Amapa' ñato' sapa' čhate' sotenapañ
añte' nepalltena carta ñeñt̃cha' señoate' atto
po'poñ anetso'marnesha'pa' e'ñech cohuen
entapretennet atto napa' cohuen netorrena
Yomporecop. Tarraña napa' ama es nepallteno.
Ñehua, ñaña čhate' sotenapañ añte' nepalltena
carta ñeñt̃cha' sequellcon sa alloch señoat̃ch
po'potantañ acheñ atto e'ñe cohuen sentenen
na, atet̃ pena po'psheññečno ñeñt̃ serrpare'tets
attoch cohuen enteñ acheñenesha' e'ñe ñañeña.

² Tarraña napa' ama nepallteno ñeñt̃ po'poñ
carta ñeñt̃cha' eñoate' po'potantañ acheñenesha'
ñeñt̃ atto netorrena na Yomporecoppa' ñeñt̃ña
atarr sherbets. Tarro'mar sapa' saña e'ñe
sherbets atet̃ ñerra'mrrate' necarta nepenes.
Tarro'mar allempo acheñenesha' eñotenset sa
atto te'pa' o' soctape'cherr cohuen Yomporecop,
ñeñt̃cha'ña eñotatenahuet ñeñt̃ atto netorrena

na, ñeñt̃pa' ñeñt̃ña e'ñe sherbets Yomporecop. Ñato' o'ch netma'ntacha atet: Na necarta ñeñt̃ña eñotatenahuet ñeñt̃pa' all aquellcaret e'ñe neyoçhro ñeñt̃cha' lleyen allohuen acheñenesha' ñeñt̃cha'ña eñotatenahuet.

³ Ñaña sa atto te'pa' sorrdaten ñeñt̃ e'ñe cohuentetsa, acheñenesha'ñapa' o'ch eñotapretaset ñeñt̃pa' po'ñoçh Cristo po'taruas pene'. Ñato' o'ch netma'ntacha atet: Sapa' atet sesherben ñerra'mrrate' yecarta ñeñt̃cha' eñotatenahuet, ñeñt̃ cartapa' o' quellca'huonay Cristo e'ñe ña. Añ cartapa' ahuo't aquellca'huareta ahuañmo'choñ allempo yapa' yeçhapatonas Yompor po'ñoñ ñeñt̃ same'ñatate' Yompor. Tarraña añ cartapa' ama añaoye' aquellcaretto tinto, aña Yompor Puecamquẽñoñ anareta, ñeñt̃ara Yompor ñeñt̃ ama arromñañeshayaye. Tarraña añ cartapa' ama arreye' aquellcarete mapyettallo. Añpa' arrña aquellcaret e'ñe ya yeyoçhro ama't ñeñt̃ey arromñañey.

Atto Yomporpa' a'pocdaterrnay e'ñe etserra

⁴⁻⁵ Napa' neñoteñ ama nepallteno po'poñ carta ñeñt̃cha' eñotatenahuet. Saña ñeñtes e'ñe necarta nepenes. Ama notenso e'ñe nañeña nohuamencoñ es nepa'yen. Aña e'ñe neyemteñoñ Cristo napa' netorrena Pomporecop. Ora allohuen es nepa'yen Yomporña ahuañencañ nepene'.

⁶ Ñeñt̃ara Yompor ñeñt̃ ahuañencañ yepene' allochñapa' attoch yeserrpare'terrñañ pocpañña ñeñt̃ atet a'pocdaterrnay e'ñe etserra. Añpa' ama atteyaye atet pa' ahuañ Yompor allempo apan Moisés po'ñoñ ñeñt̃ anarettatset' ñeñt̃cha' e'ñe

yetsotuañ esheccha' a'queshp̄ateney Yompor. Ñeñt̄ ama etsotaye'te, ñocpuetpa' o' anarettet rromuetcha', chenuërretcha'. Tarraña ñeñt̄ atto a'pocatuerrnay Yompor etserra, ñeñt̄pa' atto apueneŷ Puecamquẽñ alloch yocrra'huerra, tayoteñ errponohuañen.

⁷ Añ ñoñets ñeñt̄ aquellcarettatsa mapyettallo, ñeñt̄ ama etsotenaye, ñocpuetpa' o' anarettet rromuetcha', chenuërretcha'. Ñama ahuañ allempo Yomporpa' apan Moisés po'ñoñ atet, e'ñe po'cohuentañoñ apan Moisés. Moiséspa' atet orrta pa'clloyot̄ cha poptena, atarr a'rrechatañ. Ama't israelnesha'pa' ama eshcaye' cohuaclle'cheto. Tarraña ama't atet p̄aña'pa' acoṗoteñ maya'huanerr ñeñt̄ atto poptena.

⁸⁻⁹ Ama't añ cotaṗñatser ñeñt̄cha' ya'chencaterrayeñpa' tarraña Yomporpa' atarr cohuenot̄ orrtach allempo. Te'ña e'ñe ellonetpa' o' alla orrtaterrnayerr ña pocṗañña attoch e'ñe pocte' entuerrey. Ñeñt̄pa' e'ñe Parets Puecamquẽñoñ orrtatuerrnay ñeñto'marña ñapa' ello cohuentena nanac.

¹⁰ Ñeñt̄ atet popta ahuañ Moisés pa'clloyot̄ allempo aṗ Yompor po'ñoñ, te'ña ñeñt̄pa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñt̄ atarr cohuen yenten, ello metanenan atto cohuenta't Moisés po'ñoñ.

¹¹ Tarro'mar ñeñt̄ atet cohuenta't Moisés ñeñt̄pa' acoṗoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñt̄pa' amach ahuañañat̄terro, ñeñto'marña ñeñt̄pa' ello metanenan Moisés po'cohuenña.

Atto Cristo po'cohuenña ñeñtpa' amach ahuañañaatterro

12 Yapa' o' yeñoterrñañ Cristo po'cohuenña ñeñtpa' amach ahuañañaatterro. Ñeñto'marña yapa' ama yepenquëñoŕeye' yeserrpare'teññañe po'ñoñ.

13 Yapa' ama atŕeye' yepeno atet pa' ahuaŕ Moisés. Ñapa' cha huañerr atto popta pa'clloyotpa' ahuo't ca'macŕe'cha allochña israelneshapa' amach eñchetop' clloyot o' huañerr atto poptena.

14 Israelneshapa' ama chapaneto pueyoçhreto attoch cotape'cherret cohuen Yomporecop. Ama't ŕeme'ttsen ñerra'm esempo lleyeññañet ñeñŕ a'pocŕat Yompor ahuaŕ attaretach amach chapaneto pueyoçhro ñeñŕ atet muenen Yompor. Po'ñoçhpa' añaotcha'ña çhaponaya yeyoçhro ñeñŕ atet muenen Yompor e'ñe yeyemteñoŕ Puechemer ñeñŕ Cristo. Israelneshapa' ama cohuenaye' enteñeto Cristo ñeñto'mar noten ñetpa' ŕeme'ttsen atet penet ñerra'mrrate' çho ca'macŕe'chenet.

15 Po'ñoçh ama't ŕeme'ttsen ñerra'm esempo e'mñnotenet all lleyeññañet Moisés po'ñoñ amach es eñnoteneto. Chach ottenet ñerra'mrrate' cha es a'npuenahuet attoch amach eñotoñeto Yompor pocŕapña.

16 Tarraña ama't puesheñarroŕeya ñeñŕey erra'tseney acheñrey, allempoteñ yaguër Yepartseshar Cristo, allempoteñcha'ña çhaponaya yeyoçhro ñeñŕ atet muenen Yompor; Cristopa' ñachña yehuapore'tamŕse'ña ñeñŕ ya'npuenayeñ.

17 Ñeñŕ yoten Parets Puecamquëñ, ñeñŕara Yepartseshar Cristo Puecamquëñ. Ñaña atarr

cosheñtso'tsened ñerra'm esempoch çhaponaya Cristo Puecamquëñ yeyochro. O'huañcha'yemue-roçhtame'ta attoch puechemer perrey Yompor, e'ñech yocsheñsha'yocter Yompor.

¹⁸ Allohueney ñeñtey ame'ñenaya Yepartseshar Cristo, ña Puecamquëñpa' ñachña ya'po'poñeterre', allochñapa' allo'nach yesen cohuentapretaya Cristo. Yapa' ama atteyayye ñerra'mrrate' ñeñt a'natacle'charet attoch amach enteññañeto Cristo po'cohuenña. Yapa' e'ñe yecueñoť Cristo po'cohuenña, yapa'cho'ña o'ch yecohuentapreteña yaña, atet ñerra'mrrate' rerep poptetsa ñerra'm çho yecuach atsrretonet.

4

Atto Pablopa' atarr cohuen yeçhatenanet Yompor po'ñoñ

¹ Yomporpa' e'ñe puemuerenoť muenatenen o'ch netorreññaña ñeñt nanac sherbets ñocop. Ñeñto'marña napa' ama nellquëñoťeye' neserrpare'teññañe po'ñoñ.

² Ñeñt a'nahua es pa'yenet ñeñt apencoçhen yenten yocop ya ñeñtey torretsa Yomporecoppa' ñeñtña napa' o' na'ypo'ñañper. Ñaña napa' ama es neshquëñoť nepa'yeno masheñeshacop. Ñaña napa' allempo neserrpare'tateñ acheñenesha' ama çhoye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñoçh ñeñt atet oten po'ñoñ. Yomporpa' entenen ñeñt atet notenes ñeñtpa' e'ñe po'ñoçh atet. Ñaña ama't erra'tsena acheñer ñeñt eñotene' ñeñt e'ñe

pocte' entenet ñet pueyoçhretopa' ñetpa'cho'ña e'ñech cohuen entapretennet.

³ Atto yeserrpare'teññañ Yompor po'ñoñ ñeñt po'ñoçh alloch yequeshperra tarraña patantarr acheñenesha'pa' amach çhapaneto pueyoçhreto ñeñt alloch yequeshperra. Ñeñt atet petsapa' allo'na senet allcha' chenca'huerret.

⁴ Ñeñtara acheñenesha' ñeñt ama ame'netso, ñetpa' añña po'yomporer penet arr patsro ñeñt oneñeñ, ñeñtña ama muenatenaneto o'ch çhapanet pueyoçhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñtara yoten cohuen ñoñets alloch yequeshperra. Ñato' o'ch netma'ntacha atto oneñeñpa' a'natacle'chenanet attochña amach eshcaye' cohuen enteññañeto Cristo po'puetarenña.

⁵ Tarro'mar ñeñtey e'ñe yeñmañeshocmañen seserrpare'tatene'pa' ñeñtpa' ama añecpaye' atet yepeno attoch senteney ya ñerra'mrrate' samo'mte' sepeney. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yeforrena socop e'ñe yemorrenteñoñ Jesús.

⁶ Ñehua, yapa' yeñoteñ atet ot ahuat Yompor, ñeñtpa' atet ot: "Eñalletepa'ch pueta're' allochñapa' o'huañcha' checmet." Ñeñtara Yompor te'ñapa' o' a'puetarsañperrnay yaña yeyoçher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemteñoñ

Yomporpa' ñapa' chocmach ahuamencat peney

7 Ñeñtpa' atto Yomporpa' ahuo't chorrerrya yeyochro po'cohuenña, ama't yapa' arromñañaya, ama esoshe'mayayye. Añecopña o' chorrerrya ya ama't ñeñtey ama esoshe'mayayye, allochñapa' attoch eñochet ñeñt' atto atarr ahuamencat yentnapa' ñeñtpa' ama yoyaye yehuomenc, ñeñtpa' Yomporeshot huena. Ñato' o'ch netma'ntacha atet ñerra'm ahuat po'poñ acheñ ñerra'm esempo atarr es morrentenetpa' o'ch esha'teñet patsrrogo ama't ñeñt' coyem'pa' ama e'ñe cohuenayaye.

8 Ñehua, ama't allemateñcha' huaponaya ñeñtcha' atarr ya'llpatate', tarraña chocmach eñall attoch yesuanemñ. Ñaña ama'tcha' atarr yellquënañ nanacpa' tarraña chocmach eñall attoch yesuanemñ allohuen ñeñt' allcatañtetsa.

9 Ñehua, ama'tcha' cotare'teney ñeñt' ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' chocmach alla yetanterra.

10 Chocmach muene' yerromañ atet pete't Jesús. Tarraña atto Jesúsapa' o' alla tanterra yapa'cho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra.

11 Atto allponmat yocrrena añe patsro yapa' chocmach pomatatenyet yerromuepa'to'. E'ñe yemorrenteñoñ Jesús atet penyet. Tarraña atto Jesúsapa' o' alla tanterra, yapa'cho'ña attoña a'queshpaterrey allempo es yehuenoya ama't yapa' arromñañenesaya. Attochña yeñotach acheñenesha' atto Jesús te'pa' o' betterra.

12 E'ñe netorreñoõ Cristocop chocmach nanac nemuerochetuanena autsanca' rromuets. Tarraña ñeñtpa' atarr cohuen socop tarro'mar ñeñtpa' alloch e'ñe sequeshpa'huerra samã.

13 Añmapa' ñeñt atet oten Yompor po'ñoñ ñeñt atet anuaret ahuatoteñ ñeñtpa' atet oten ñeñt quellquë' libro Salmos, "Napa' atarr neyemteña Yompor ñeñto'mar atet ne'ñorena ñocop." Yapa'cho'ña e'ñe attecma yoctape'chen yaña. E'ñe attecma yeyemteña Yompor, ñeñto'mar yapa'cho'ña attecma ye'ñorena yaña.

14 Yapa' yeñoteñ Yomporpa' ahuo't tantaterran Puechemer ñeñtara Yepartseshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet pan Puechemer Jesús, allochñapa' ama't sapa' o'ch chapatuerres allohuenes e'ñe parro ñesho.

15 Ñeñto'marña napa' Yomporña nemnate' o'ch nemuerochtame'ta; ñeñtpa' e'ñe socop, allochñapa' attotcha' Yompor puemuereña chapcha' shonte' acheñenesesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chochtateññañ Yompor.

16 Ñeñto'marña napa' ama nellquëño'teye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëñña' allo'na sen huomencatnomuets e'ñe pate'tets yet.

17 Tarro'mar ñeñt atto allpon yemue-rochtame'tyena añe patsro, ñeñtpa' ama esoyaye,

e'ñe mamecpa. Ñeñtpa' añecpaña huennaya allochñapa' attoch huapatuerrnay ñeñt atarr nanac cosheñets ñeñt ama ahuañaño ama't errponaña, ñeñt ello nanac atarr cochnesha'tetsa, ñeñt atarr nanac cohuen.

¹⁸ Tarro'mar yapa' ama añeye' yeyemteno ñeñt allpon cochnesha' yentyen arr patsro, tarro'mar añechno ñeñt allpon yentyenpa' huañerrcha'. Yapa' añña yeyemtena añechno ñeñt cohuentetsa Yomporecop ñeñtpa' ama entpahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr all pue'ntaño

¹ Yapa' yeñoteñ ñeñtey arromñaatey, yechetspa' chocmach huañerr. E'ñe mamecpa sherbeney aña patsro, atet ñerra'mrrate' yequërpachet ñeñt pocollashe'm all yemanatena. Ñeñt pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena aña patsro ñeñt yepacllashe'm yepen. Tarraña yapa' o' yeñoter ñerra'm esempoch yerro, Yomporpa' o' añño'terrnay ñeñtcha' yepaquëll yeperr all pue'ntaño allcha' yeycha'huerra, ñeñtpa' amach ahuañaña'terro. Ñeñtcha' yepaquëll yeperr allpa' ama arromñaateshaye' yechcatenaye, Yomporña yechcatene'.

² Po'ñoçh arr patsro yechets ñeñt yepaquëll yepenpa' chocmach es e'mnatatuene'. Ñeñto'marña yapa' atarr yemneñ o'ch

yehorrerra ñeñtcha' yepaquëll yeperr Yompor pue'ntaño.

³ Tarro'mar yemneñ yecamquëñpa' o'ch chorrerrana ñeñtcha' pa'shtam perr Yompor pue'ntaño, allochñapa' yecamquëñpa' amach atta huocchapoterro chocmach eñall ñeñtcha' chorrena.

⁴ Tarraña atet ñerra'm te' orameñ yechets ñeñt yepaquëll yepen atto yocrrena arr patsro, chocmach eñall ñeñtcha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñeternay Yompor tayoteñ ama't esempo huerra, ñeñtcha'ña pa'shtam perr yecamquëñ. Allochñapa' attoch yocrrerra etserra correñets ñeñt amach ahuañañatterro, ñeñtcha'ña a'huañaterre'ña ñeñt atto ya'rromñaate't. Ñato' o'ch netma'ntacha atet ñerra'mrrate' o'ch yehorra shetamuets ñeñt e'ñe etserra emarr ñeñtcha' yena' enot o'ch yepmata. Allochñapa' ñeñtcha' yena' enot, ñeñtcha'ña a'natue'ña mellashañ ñeñt yehorre't ahuañoñeñ. Allochñapa' attoch eñall ñeñtcha' yehorratenaya.

⁵ Ñeñt yemnatene' e'ñe atet ñeñtpa' Yompor ña atet yepatene', tarro'mar ñapa' chorrenya Puecamquëñ ñeñtña yeñotatene' orameñ eñall cohuenñats ñeñt o'patatenya ñeñtcha' aphuerrey Yompor.

⁶ Ñeñto'marña e'ñe yeyemteño't Yompor chocmach yecueñ ñeñtcha' atet perrnay esempo. Yeñoteñ yechets yepaquëll yepenmeñ arr patsro allaparo'tsenmeñey attoch yeycha'huerra Yepartsesharsho.

7 E'ñe yeyemteñoť Yomporpa' allo'nach yesen eñotnomue' ñeñťcha' atet perrnay ña, ama aņeye' es yeñotatenaye ñeñť yentyen arr patsro.

8 E'ñe yeyemteñoť Yompor ċhocmach yecuen ñeñťcha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñť yepaquell yepen arr attoch yeċhap allcha' yocrra'huerra Yepartse-sharesho.

9 Yapa' ñeñťach paterr yema'yoċhrena ċhocmuepa'ċhña yocshateñ Yepartseshar, ama't allempo orameñ yocrrena e'ñe yeċtso arr patsro, ñaña ama't allempoch yerroma o'ch yesa'nom yechets e'ñepa'ċh Yepartsesharesho'tseney attoch yocshateñ e'ñe all pue'ntaño.

10 Tarro'mar o' anareťta allohuenacpay yehuapuepa'to' Cristesho allcha' eñotatareťey e'ñe puesheña'ttsoy. Allochñapa' allcha'ña atet pa'yesey erroťencha' entapretuerrey, ñato' e'ñech cohuen entapretuerrey atto e'ñe cohuen es yepa'yen e'ñe yeċtsoť allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

11 Ñeñťpa' ama't atarr yoroċhen yenteñeñña Yompor, țarraña nocoppa' ama yoroċhenayaye țarro'mar Yomporpa' entenen e'ñe cohuen ñeñť atet nepena. Te'pa' aña palltetsa o'ch noctape'ċhater allohuen aċeñenesha' attoch ñetpa'ċho'ña e'ñech cohuen entapretennet. Ama't sapa'ċho'ña te'pa' necuenes, nemneñ o'ch seņoter

sama e'ne seyo'chro atto e'ne neñmañesha' cohuen es ne'pa'yen.

12 Ñeñt' atet notenes te'pa' ñeñt'pa' ama añecpayaye o'ch alla neñerrerr cohuen ñeñt' e'ne nocpa. Añecopña o' alla neñerrerr atet allochñapa' o'ch alla socshapreterrna, allochñapa' attoch seño'ch ote' ñeñt' e'ne ñañeña cohuen entetsa e'ne pocta'pño'mara. Ama añeye' eñoteno pueyo'chro ñeñt' cohuentetsa Yomporecop.

13 Ñehua, sapa' čhate' sotenen napa' čho' muene' nemospuena. Ñerra'm po'ño'ch čha nemospuena'pa' ñeñt'pa' e'ne pocte' Yomporecop. Ñaña ñerra'm ama čho'ye' nemospueno atto e'ne cohuenare' es noctape'chen ñeñt'pa'čho'ña e'ne pocte' allo nesherbene' sa.

14-15 Ñaña atto Cristopa' atarr morrentenya ñeñt'ña ama yemnatenaye o'ch allo'na yesen corratsa e'ne yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ne yocpa. Ñeñt'pa' ñeñt'ara yoten o' yerromaprecha Cristo, allohueney ñeñt'ey ame'ñenaya. Añcha'ña atet yocrrena e'ne ñocop, ñeñt' rromats yocop, elloñapa' alla tanterra yocop.

16 Ñeñto'marña napa' ama't puesheñarrapa' o'huañcha' cohuen nenteñ ñeñt' e'ne cohuen enten po'potantañ achenesha' arr patsro e'ne ñet pocta'pño'maret, ñeñt'pa' arromña'a pocta'pña. Tarraña ama't na ahua'tpa' cohuen nentapretanete't pocta'pña. Ñeñto'marña napa'čho'ña tsena'tatnete't Cristo allempo,

Ƨarraña Ƨe'pa' o' huañ atet neñch Cristo.

17 Ñeñto'marña ñeñtey o' yeyemtera Cristo, Yomporpa' o' etserrataterrnay yocƧañña e'ñe poc-tacma. Ñeññ atet yocƧape'che't ahuat, ñeñƧpa' o' huañerr, Ƨe'ñapa' o' e'ñe yocƧape'cherr ñeññ e'ñe cohuenare' etserra.

18 Ñeñña o' atet perrnay Yompor ñeññ muenatan Puechemer Cristo, ñachña yamo'tstaterre' Pomporesho. Ñeññara Yompor ama't napa' ahuo't llesensa'n attoch neñotach acheñenesha' allochñapa' ñetpa'cho'ña o'ch amo'tsterranet ñamet Yompor.

19 Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomporesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor.

20 Ñeñto'marña yapa' allsensaretey ñeññcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeññpa' atto Yomporpa' o' hua'ñerres o'ch same'ñera, Ƨarraña ñeññpa' e'ñe ya yeserrpare'tateñotes o' hua'ñerres Yompor. Ñeñto'mar Ƨe'pa' o'ch notas Cristocop, ñach same'ñerra allochñapa' attoch e'ñe amo'tsterra Yompor e'ñe pocƧacma.

21 Añ ñeññara Cristo ñapa' ama't parrochapa' ama ñano ñeññ ama pocƧeye' enteno Pompor Parets, Ƨarraña Pomporñapa' ahuo't muenateñ

o'ch atet aṗareṭta ñerra'mrrate' acheñ ñeñṭ atarr ochñaṭ. Tarraña ñeñṭ atto aṗareṭṭapa' ñeñṭpa' e'ñe yocop. Allochñaṗa' e'ñe yeyemteñoṭ Puechemer Cristo, Pomporña yapuerre' alloch e'ñe pocte' enterrey.

6

Ñeñṭ torretsa Yomporecoppa' añ poctetsa ñocop ḥocmach orrtatenan ñeñṭ e'ñe pocte' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puemuereña.

² Ñehua, ñeñṭpa' atet oteney Yompor po'ñon ñeñṭ anuaret ahuaṭoteñ, ñeñṭpa' Yompor atet otets:

Allempo seḥore'tenen napa' e'ñe ne'mñotenes ñeñṭ atet sotenen, tarro'mar allempopa' o' ḥap ñeñṭ poctetsa o'ch saguërren. Nañaṗa' o'ch naguërres samã. Attoña napa' ahuo't neyenpas tarro'mar allempopa' o' ḥap ñeñṭ poctetsa attoch na'quesḥpaterres.

Ñeñṭo'marña na te'pa' o'ch notas, o' e'ñe ḥap allempo ñeñṭ poctetsa o'ch saguër Yompor, tarro'mar te'pa' o' ḥap allempoch a'quesḥpaterrey.

³ Ñehua, yapa' yeñoteñ ñeñṭey ame'ñetsa ñerra'm o'ch yeṗa'yen ñeñṭ ama pocteyaye Yomporecop ñeñṭña ama ame'ñetsopa' ḥach ya'npare'teñ attoch ame'ñerret ñamet. Ñeñṭo'marña yapa' ama yemno ama't mamesha o'ch ya'npare'ch ama't puesheñarra allochñaṗa' attoch ame'ñeret ñamet Yompor. Ñaña ya atto yetorrena Yomporecoppa' ama yemno o'ch atet entapretyet

ñeñt̃ ama cohuenayaye. Allochñapa' amach achm̃are'teññañeto Yompor po'taruas e'ñe ya atet yepatse'tyeñoť.

4 Yapa' añña yemnen ama't erroťeno'tsenya čhocmach yemneñ o'ch yeñotach acheñenesha' po'ñoč e'ñe cohuen yetorrena Yomporecop ñeñť atet pochtetsa yocop ñeñťey torretsa Yomporecop. Ñeñťpa' añečno ñeñťcha'ña eñotaterrahuet: allpon es yehuapoyapa' čhocmach ya'huanteñ e'ñe cohuen, ama't allpon atto yemueročhtame'tyena, ama't allpon ñeñť yepallta'yena, čhocmach ya'huanteñ allohuen. Ama't ora allohuen ñeñť allpon ñeñť allcatañtetsa, țarraña ñeñťpa' čhocmach ya'huanteñ.

5 Ñaña atto ashta'yenyet, atto yottam̃penyet, atto ama'točhtana'tenyet pa'tsrre'mueñoťet, atto atarr nanac yetaruasen, atto yarepen țorratsa Yomporecop, atto yemueročhtena yachporrñoť, ñeñťña eñotatene'ña allohuen acheñenesha' atto yapa' e'ñe cohuen yetorrena Yomporecop.

6 Ñaña atto yeñmañesha' yocrrena, ama sosya'tsañeye' yoc̃tape'chyeno, ñaña atto yeñoten ñeñť e'ñe po'ñoč Yompor po'ñoñ ñeñť ama shequēntsoyaye, ñaña atto es ya'huanta'yen, amachña čha atsrre'matenye, ñaña attochña e'ñe ya'muerañtena, ñaña atto chorrenya Parets Puecamquēñ, ñaña atto e'ñe cohuen yemorrenteña allohuen masheñneshačno, ñeñťpa'čo'ña ñeñťña eñotatene'ña acheñenesha' atto yapa' e'ñe cohuen yetorrena Yomporecop.

7 Ñaña atto ye'ñorena ñeñťpa' e'ñe po'ñoč atet. Yomporña po'huamenc ñeñť ahuamencat yepene'.

Ñaña ñeñt e'ñe pocte' enten Yompor, ñeñtpa' ñeñtña allo chocma es yeþa'yen, alloña yeçllarena Yomporecop, ñeñtpa' alloña yemoñeññaña Yompor poctaþña.

⁸ Erroteno e'ñech cohuen entapretenyet, tarraña errotenoñapa' amach cohuenaye' entapretenyeto; erroteno e'ñech cohuen eñosyenet yocop, errotenoñapa' çhach sasare'tenyet. Errotenopa' attach entenyet ñerra'mrrate' atta yeshquën, ama't amach çhoye' yeshquëno.

⁹ Errotenopa' e'ñech cohuen emchorrenyet, errotenoñapa' amach acua'þsenaye' entenyeto. Errotenopa' autsaycha' rromuets, tarraña chocmach allo'na yesen huonçhetsa. Erroteno ama'tcha' a'coñchatareþey, yañapa' corretsayach.

¹⁰ Ñaña erroteno ama'tcha' yellquënañpa' tarraña chocmach alla yocsherra. Ñaña ama't e'ñe huocchañeypa' shonte'ch coçhnesha' coþaþñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomproshot.

Atto Pablopa' e'ñe pueyoçhrocmañen morrentenana allohuen ñeñt ame'ñenaya Yompor

¹¹ Te'pa' masheñneshacha' corinto'marnesha o' neñotatuas ora allpon ñeñt atet noctape'chen neyoçhro. E'ñe neyoçhrocmañen nemorrentensa.

¹² Nocoppa' ama palltenmeñe ama't mamesha attoch nemorrentersa e'ñe poctacma. Añña sapa' çhocmate' sepalltena attoch semorrenter-rna naña.

¹³ Napa' e'ñe nechemeresha' nepenes. Ñeñto'marña o'ch nenamas, o'ch notas, atto

napa' e'ñe neyočhrocmañen nemorrentensa sa, sapa'cho'ña añ poctetsa e'ñe seyočhrocmañenpa' o'ch semorrenterrna namña.

Atto ama ayemuetpahuo ñeñt ama ame'ñetso

14 Te'pa' o'ch noterrser po'poñ, amach e'ñe seyemtatsche ñeñt ama ame'ñetso, tarro'mar amach patrraye' soctape'chueno. Acheñ ñeñt e'ñe pocte' es p̄a'yetspa' amate' errotenoť yemtanoña acheñ ñeñt ama cohuenaye' es p̄a'yetso, tarro'mar ama attecmaye' es p̄a'yeneto. Ñato' o'ch netma'ntacha atet ñerra'mrrate' checmete'pa' amate' errotenoť alla epteto parro epuet puetare'.

15 Ñeñt atet pena Cristo ñaña oneñeť amate' errotenoť cohuen amo'tstanna'teto. Attecma ñaña ñeñt ame'ñetsapa' amach patrraye' cotape'chueneto epuet ñeñt ama ame'ñetso.

Atto yapa' pa'paquëll peney Yompor

16 Ñaña ñeñt pa'paquëll pen Yomporpa' ama atteyaye ñerra'mrrate' ñeñt ayečhcataret ñeñt po'yomporer p̄a'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquëll peney Yompor ñeñt ama arromñaťeshayaye. Añpa' ñeñt atet oten Yompor:

Napa' čhocmach neyčhena e'ñe ñesheto parro allcha' nechopeñe'chen. Napa' Po'yomporer pennet, ñetpa'cho'ña e'ñe neyochrenesha' nepenanet.

17 Ñeñto'marña Yomporpa' oteneý:

Añ poctetsa o'ch sesuanemñ ñeñt ama ame'ñetso, allochñapa' o'ch sellopa'tetstatua socta'p̄ña.

Amach seyčhapretatsto sosya'tsañ ñeñt or-
rtatyenet. Allochñapa' attochña napa' o'ch
naguërres e'ñe nocsheñesha'.

18 Allochña sapa' attochña e'ñe Sompor seperren
na, napa'cho'ña o'ch nechemereshá'
neřohuerres ama't ñaña allohuen
nesñeneshohuen. Ñeñtpa' atet ot Yompor
ñeñt nanac partsotets.

7

1 Ñehua, e'ñe nemorrenteñořes, masheñneshacha'
ñaña nočhaneshacha' o' notuas atet oteney
Yompor ñeñtcha' atet perrnay. Ñeñto'marña
te'pa' añ poctetsa yocop yapa' o'ch yesuanem
ora allohuen ñeñt čhocma a'sosyatene' yechets
ñaña ñeñt čhocma a'sosyatene' ama't yecamquëñ.
Añña e'ñe yem'cha'na'teñoř Yomporpa' añcha'ña
yema'yočhrena ñeñt pocte' enten ña.

*Atto Pablopa' o' alla atarr coshater
corinto'marnesha' tarro'mar o' cotape'cherret
cohuen e'ñe etserra*

2 Napa' atarr nemneñ, masheñneshacha' o'ch
alla semorrenterrna e'ñe seyočhrocmañen.
Napa' ama't puesheñarrořesapa' ama čho erroř
neřaso, ñaña ama't puesheñarrořesa ama ańeye'
neyčhataso ñeñt ama cohuenayaye, ñaña ama't
puesheñarrořesapa' ama čhoye' neshcare'taso
ama't e'ñe mamesha.

3 Ñeñtpa' ama añecpaye' notenso o'ch
neyohuare'tasa. Añecopña o' alla noterrser
e'ñe nemorrenteñořes ñeñt atet o' notuanmas.
Po'ñočhpa' atarr nemorrentensa e'ñe

neyoçhrocmañen. Ñeñño'marña napa' e'ñe pocte' nenteñ e'ñech parrocmá yocrrena ama't ñaña e'ñech parrocmá yerroma.

⁴Napa' neñotenes sapa' çhocmach sepa'yen ñeññ cohentetsa Yomporecop. Ñeñño'marña napa' atarr nocshapretensa. Ama't nellquënañ nemue-roçhteñoõpa' elloña o' alla nanac socshaterren.

⁵Ama't allempo neçherr Macedoniopa' çhocma atarr nellca'huerrerr alla. Allpa'çho'ña çhocma es nehuapoya pa'namen ñeññña ama't mameshapa' ama eshcaye' neñmatataye neyoçhro attoch e'ñe cohuen nellap̄sos muecheť.

⁶Atteñapa' o' çherr masheñ Tito. Atto çherr masheñ Titopa' allempoña Yomporpa' alla coshaterren neyoçhro, ñeññara Yompor ñeññ çhocma yocshatene' allempo es yelcatene'.

⁷Ama e'ñe aña nocshataye atto çherr Tito, aña atarr nocshatene' ñeññ atto e'ñe cohuen entapretensa', ñapa'çho'ña atarr socshater. Nehua, ñapa' eñotatuerrren atto sapa' atarr o' seyerpuenna, ñaña o' eñotatuerrren atto sellquëñoõ sapa' o' alla same'ñerra e'ñe cohuen, ñaña o' eñotatuerrren atto o' alla sellcapreterrna ñeññ atto sellcatenen na. Ñeññ allpon serrpare'tatuerrren, napa' ñeññña ello atarr nanac nocshaterre'.

⁸Carta ñeññ nequellconas ahuaña, ñeññpa' çha llecatas. Ñeñño'marña allempo napa'çho'ña çha muene' llecatna naña țarro'mar o' nemñonas atet carta. Ama't te'pa' neñoteñ añ necarta çha llecatenes țarraña ñeññpa' e'ñe mamecpa, ñeññ e'ñe pocte' nenteñ.

⁹Attoña te' napa' e'ñe cohuen nocshena. Ñeññpa'

ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëño' o' alla same'ñerra e'ñe cohuen. Tarraña atto sellquëna sapa' ñeñtpa' atet senteñ ñerra'm Yompor sellcatene' ñeñtcha'ña same'ñaterraya e'ñe cohuen ñocop. Ñeñto'marña ñeñt atet neponas, ñeñtpa' e'ñe cohuen socop, ñeñt allopa' ama choye' erroten nepenso ñeñt ama pocteyaye ama't mamesha.

¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'cherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñtpa' ñeñtña allo'na aneney rromueñtso, allcha' yechenquërra poctacma.

¹¹ Sa sellquëñapa' e'ñe atet senteñ ñerra'm Yompor e'ñe sellcatene'. Ñeñto'marña allempoteñ yorochen senten sa so'chñar ñeñto'marña sapa' semneñ o'ch alla cohuen nentapreterres. Ñaña ñeñtpa' apencochen senteñ ñeñt atarr atparñañ. Ñeñto'marña semñchaño'pa' atarr semneñ o'ch alla senterren, attoch e'ñe cohuen na'poctatonas. Ñaña allempoteñña e'ñe pocte' senteñ o'ch secoñchach ñeñt atparñañtetsa. Ñeñto'marña te'pa' atet o' se'pohuerra ñeñt e'ñe pocte' nenten, allochñapa' amach allo'na sa'yohuaretteno.

¹² Ñaña o'ch notas, ahuaña allempo nequellquërrnaserr añ necartapa' ama atparñañecpaye' nequellquërrnaserro ñaña ama nocpaye' nequellquërrnaserro ñeñten atarr

atpare'tenet. Añecpa'naña nequellquërrnaserr carta allochñapa' attoch çhaponasa seyoçhro po'ñoçh sapa' atarr semorrentenna. Ama't Yomporpa' eñotenes.

13 Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra.

14 Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ñya. Allempoña çhap seshopa' e'ñe atet same'ñya ñeñt atet noch. Ñeñto'marña napa' ama't mameshapa' amach erroteno't sepenca'tno, ama atta nommo'chenso. E'ñe po'ñoçh atet sepho'uena ñeñt atet noch Tito. Ñaña ñeñt ora allpon atet notas, ñeñtpa' e'ñe po'ñoçh atet.

15 Ñaña e'ñe semcha'na'teño'tpa' ahuo't sagañ Tito e'ñe cohuen. Ñaña ñeñt ora allpon cotape'chatas Tito sapa' ahuo't e'ñe cohuen ame'ñaterra. Ñeñto'marña te' Titopa' e'ñe pueyerpueño'tes, ñapa' atarr morrentensa nanac.

16 Ñeñto'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporecop

1 Ñehua, te' masheñeshacha' ñaña noçhaneshacha' o'ch neñotaterriserr atto Yomporpa' orrtaterranet puemuereña allohuenacop ñeñt pame'ñeño'tet çhocma apçha'yenet all anetso Macedonio'mar.

² Ñehua, macedonio'marnesha'pa' ama't shonte' pa'namen huenanet ñeññ atarr topatenahuet, tarraña ñetpa' chocma atarr coshenet. Ñaña ama't atarr huocchañetyenet, tarraña ñetpa' chocma apa'yeñet po'potantañ ñeññ atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom.

³ Napa' neñotenanet ñetpa' ahuo't pomyenet ñeññ allpon muena'yenet ñet puesheña'ttset. Ama't ñocpuetpa' palltenetañ tarraña ellonetña'pa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puemnenño'tet atet penet.

⁴ Ñetpa' chocma a'p'to'tennet pocte'te' o'ch notanet attoch yenpuet ñamet ñeññ masheñeshachno huocchañeshachno.

⁵ Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetña'pa' ñanmacmuet o' e'ñe pomhuerret Yomporecop, allo'tpa' ñaña yocop ñeññ atet muenateney Yompor allohueney.

⁶ Atet nenteñ macedonio'marnesha' atarr es pomuenet Yomporecop, ñeñño'marña te'pa' o' alla notererr masheñ Tito o'ch alla ahuerterr sesho, allochña'pa' attoch allo'nach seño'tnen e'ñe cohuen pomuene' Yomporecop, ñeññ allpon ye'chatensa' ahuaña Tito.

⁷ Ñaña sapa' atarr setsoteññañ allohuen ñeññ cohuen enten Yompor. Ñanompa' atarr seyemteña Yompor, ñaña atarr cohuen seserrpare'teññañ

po'ñoñ, pa'namen esocmañen es seño'tyen, ñaña e'ñe socsheñesha' es sepa'yen Yomporecop, ñaña e'ñe cohuen semorrentenya. Ñaña e'ñe setsotuen ñeñt atet cohuentetsa Yomporecop. Ñeñto'marña te'pa' aña sepalltena paterr attoch o'ch setsota eñote' apa'yese' po'potantañ ñeñt es pallta'yetsa.

⁸ Napa' ama neyechare'teño'teye' notenso atet, aña nemnen o'ch neñotatas ñeñt atet pena po'potantañ ñeñt e'ñe pocsheñeshocmañen es apa'yeñet ñeñt es pallta'yetsa. Allochña ñerra'm ñeñt señot, napa' neñotenes atetcha' sephouerra sama. Attoña neñotenes e'ñe po'ño'ch semueranna'tuena allohuenes.

⁹ Ñehua, sapa' o' seño'ter ñeñt atet pa Yepartse-shar Jesucristo. Ñapa' atarr amuerañtosa, ñapa' esocmañen echeneñ Pomporesho, tarraña e'ñe puemorrenteño'tey ya, ñaña'pa' atta huocchañetos. Allochña e'ñe puehuocchañeteño't yocop, yañapa' shonte'ch esocmañen yecherr Yomporeshot.

¹⁰⁻¹² Ñehua, sa ahuaña charopa' atarr semneñ o'ch es sapa'yeñ acheñenesha' ñeñt es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñto'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yeshahuet, e'ñe allpon semna'yen puesheña'ttsos, e'ñech allpon sapa'yesanet. Tarro'mar ñerra'm e'ñe yemneñño't es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamyé aton ñerra'm ama yecheñe. Allochña'pa' o'ch senue e'ñe poctacma. Atto'tcha'ña setsotua allohuen ñeñt atet poctetsa Yomporecop.

13 Napa' ama notenso farrecopcha' es sapa'yen allochñapa' o'ch atta atarr es sepalltena sa.

14 Añecopña notenes o'ch satecmatua. Atet ñerra'm te'pa' shonte' sechen, socoppa' añ poctetsa o'ch sapa'yen ñeñt es pallta'yetsa te'. Allochñapa' ñerra'm esempo es sepalltena samapa' añ poctetsa o'ch apuerrset ñamet, allochñapa' attochña e'ñech satecmaten.

15 Ñeñtpa' atet oteney Yompor po'ñoñ ñeñt atet anuaret ahuatoteñ, ñeñtpa' atet oten: "Ñeñt echene' shonte'pa' amach es a'pchateno. Ama't ñaña ñeñt echene' coñe'tpa' amach es pallteno."

Atto Titopa' alla ahuererr po'pocheño Corinto

16 Napa' chocma neparasyoso'teñ Yompor tarro'mar añ nenan masheñ Tito pueyo'chro atto ñapa'cho'ña chocma llecapretensa atet ñerra'm na.

17 Ñeñto'marña allempo noteñ o'ch ahuer se-sho, ñapa' e'ñe pocte' enteñ. Elloña ñapa' e'ñe puemneñño't atarr sechena o'ch alla ahuererr o'ch a'cherra'.

18 Ñaña yapa' o'ch yemñererr masheñ Tito epuet ñaña po'psheñeñ masheñ. Ñehua, añ masheñerpa' allohuen ñeñt ap'cha'yetsa pame'ñeño'tetpa' atarr cohuen enteñet atto serrpare'tatenanet añ cohuen ñoñets ñeñt alloch yequeshperra.

19 Elloña ñeñt masheñerpa' allohuen ñeñt ap'cha'yetsa pame'ñeño'tetpa' o' net o'ch yechopeñe'ch parro attoch ñach yeyenpuene' ñeñt atto yetorrena o'ch yeyenpueñ po'potantañ. Ñeñtpa' añecop sherben attoch aye'chochtateññañet Yompor, ñaña añecop

sherben attoch eñoteñet e'ñech yocsheñesha' yemneñ o'ch yeyenpannena e'ñe cohuen.

20 Ñeñto'marña o' net ñaña po'psheñeñ masheñ allochñapa' atto yapçhaten quellepa' amach cha sasare'tenyeto quellayo'mara.

21 Tarro'mar yapa' añña yema'yoçhrena o'ch yorrtat ñeñt e'ñe cohuen enten Yompor, ama't ñaña ñeñt cohuen enten acheñenesha'.

22 Ñehua, te'pa' o'ch yemñonas po'poñ masheñ ñeñtcha' tatsa, ma'psheña. Ñeñt po'psheñeñ masheñpa' napa' neñoteñ ñapa' e'ñe pocsheñeshocmañen atarr cohuen es ma'yoçhra'yena ñeñt cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmata e'ñe cohuen Yomporecop.

23 Ñaña ñerra'm esesha' sa'p'to'tene' o'ch otaset, "¿ama't se'mare'teñe masheñ Tito, erro'tsente'?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'p'to'taset ñaña añ po'psheñeñ masheñecop, sañapa' o'ch señotatanet ñetpa' arro't amñareñtenet all apçhena allohuen masheñeshachno ñeñt ame'ñetsa all Macedonio. Ñetpa' e'ñe cohuen orrtatenet Cristo po'cohuenna.

24 Ñeñto'marña te'pa' o'ch notas e'ñech cohuen sagañ añ masheñnesha', allochña ñetpa' esheccha' eñotaset sapa' po'ñoçh atarr semuerenanet, attochña eñotas ñaña allohuen masheñnesha' ñeñt pame'ñeñotet apçha'yetsa allot amñareñtenet. Allochñapa' o'ch eñotaset po'ñoçh e'ñe cohuen

same'ñena ñeñt̃ atet notenanet socop.

9

Yomporpa' añ atarr morrentena ñeñt̃ e'ñe pocsheñeshocmañen es apa'yets ñocop

¹ Ñaña ñeñt̃cha' sapchen alloch seyenpue' masheñnesha' ñeñt̃ atarr es pallta'yetsa Jerusaléño, napa' neñotenes ama sepallteno o'ch alla noctape'chaterrserr necartot̃ ñeñt̃cha' atet sepa.

² Tarro'mar napa' neñotenes ñeñt̃pa' atet atarr semnen sa. Ñeñto'marña arr Macedonio chocma noteñ macedonio'marnesha' sapa' chocma semneñ o'ch es sapa'yes añecop ñeñt̃ atarr es pallta'yetsa. Ñeñto'marña napa' e'ñe nocsheñeshocmañen neñotateñ macedonio'marnesha' ñeñt̃ atet sepena sa ñeñtes acayo'marneshas ñeñtarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'pocstat attoch es sapa'yes ñeñt̃ atarr es pallta'yetsa. Atto sapa' atarr semneñ o'ch seyenpue' ñeñt̃ atarr es pallta'yetsa, ñeñto'marña all Macedoniotpa'cho'ña te'pa' eñall shonte' ñeñt̃ muenets o'ch es apa'yenet ñamet.

³ Tarraña ama't napa' neñotenes atarr semneñeñ o'ch seyenpue' ñeñt̃ atarr es pallta'yetsa, ñeñto'marña napa' o'ch nemñonas añ masheñnesha' ñeñt̃cha' otatsa. Ñetpa' o'ch yenposset attoch sapcha' añecop ñeñt̃ es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt̃ e'ñe cohuen

notenamet socop, ñeñt'pa' e'ñe po'ñoçh atet se'pohuena.

⁴ Allochñapa' ñerra'm esempo neçhap naña sesho epan ñaña masheñneshaçhno macedonio'marnesha' ñerra'm yentosos ama sapçhatueña', allempoña yapa' çhate' parrocmayepencna'ntatanna'ta. Allempoña e'ñefe' orrena neyemtensa.

⁵ Ñeñto'marña napa' añ pocte' nenten o'ch noch po'psheñeñ masheñnesha' ñetpa' otetepa' ñanmacmuet, ñeñt'cha' sabcherraya' attoch ñetpa' o'ch yenposset attoch e'ñe sapçha'hua ñeñt' semnen sa o'ch e'ñe saphue ñeñt' es pallta'yetsa Jerusaléño, ñeñt' atet sot ahuatoteñ. Tarro'mar napa' e'ñe pocte' nenteñ sa e'ñe semneñño' e'ñech señmañesha' es sapa'yes ñeñt' atarr es pallta'yetsa. Amachña çha es enamare'tyenseto attoch es sapuenamet.

⁶ Chocmach seyerpuena añ ñoñets, ñeñt'pa' atet oten: Ñerra'm ya atarr coñe't es yapa'yen Yomporecop, yapa'çho'ña o'ch alla yaguërr ñeñt' atarr coñe't. Ñerra'm atarr aton es yapa'yen Yomporecop, yapa'çho'ña o'ch alla yaguërr ñeñt' atarr aton. Ñehua, ñato' o'ch netma'ntacha atet ñerra'mrrate' çho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapaçherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapaçherr ñerra'm esempo po'nen.

⁷ Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt' pocte' yentyen e'ñe ya yeyoçhro. Amachña yempaño'a es

yapa'yeno ñaña amachña puenamare'teñoñeta es yapuenaneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets.

⁸ Ñaña Yomporpa' shonte' esocmañen echen ñeñtcha' apuerres allochñapa' attoch chocma sechencha' shonte' ñeñt atarr cohuen socop, ñaña sechencha' shonte' attoch seyenpuen pa'namenot ñeñt cohuentetsa Yomporecop.

⁹ Añpa' ñeñt atet oten Yompor po'ñoñ ñeñt anuaret ahuatoteñ, ñeñtpa' atet oten:

Ñeñt atarr es apuene' huocchañnesha' ama't ahuatapa' amach apsalettero ñeñt atto e'ñe cohuen es pen.

¹⁰ Yomporpa' apuenescha' shonte' esocmañen allochñapa' attoch chocma sechencha' shonte' attoch seyenpuenanet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot ñeñt cohuentetsa Yomporecop. Ñeñtpa' ñerra'm netma'ntacha ñato' o'ch not: Ñeñtara Yompor ñeñt yapuene' puerets ñeñtcha' yenare'ten o'ch chap allempo po'nenpa' allempochña yeyoren ñeñtcha' yerrar yepen, ñeñtpa' Yomporña a'torene' attoch ya'yapa'cheñ o'ch yeshonteñ.

¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeyñ ñeñt es pa'namen pallta'yetsa. Ñerra'mña atet seppapa' yañapa' yach aphuerrahuet attochña ñetpa' chore'teñet Yompor o'ch ochet

“Parasyos Nompore, ða yapuene’ ora allohuen.”

12 Ñerra’m atetcha’ sepene es apa’yese’ masheñnesha’ ñeñt ame’ñetsa, ama e’ñe añepa sherbeno attoch es sapuenanet ñeñt palltenet. Añepa’ñaña sherben attoch ñetpa’cho’ña atarrcha’ chore’chet Yompor o’ch ochet: “Parasyos Nompore, ða yapatene’ ñeñt allpon yepalltena.”

13 Ñaña attoña ñetpa’ aye’chochtateññañetcha’ Yompor, tarro’mar o’ch eñotenset sapa’ po’ñoçh attera same’ñeññaña Cristo po’ñoñ. Tarro’mare’ñaña ñetpa’ aye’chochtateññañetcha’ Yompor, atto sapa’ sapuenanet pa’namen ñeñt allpon palltenet ñet, ñaña po’potantañecop.

14 E’ñech pueyerpueñoñetas sapa’ ñetpa’ atarrcha’ nanac chore’tatonaset Yompor, tarro’mar sapa’ o’ch sorrtatanet Yompor puemuereña allo atarr muerenya.

15 Yeparasyoso’chepa’ch Yompor tarro’mar ña yapuene’ Puechemer, ñeshoña huena ora muereñets ñeñt atarr coçhneshare’. Ama’t yemneñeñ o’ch ya’ye’chochtatue e’ñe poctacma, tarraña ya aromñaateypa’ amach erroñe yepe, ñaña ama yeno yeñoñ attoch ya’ye’chochtatuoñ e’ñe poctacma ñeñt atet yocshena yeyoçhro.

10

Atto Pablopa’ eñotatan corinto’marnesha’ ñapa’ e’ñe po’ñoçh allsensaret Yomporeshot

1-2 Ñehua, te’pa’ na Pablon o’ch alla noctape’chaterrser e’ñe nemuereñoñes atten ñerra’m Cristo ñeñt nanac amuerañtosta.

Puemuereñoŧey ya ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsospa' attach sentenen ama erroŧ notenso atsrre'moçhen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquënnas cartapa' allempoña sapa' atet sentenen ñerra'mrrate' ama çhoye' nemñcha'tenso ama't e'ñe mamesha, e'ñech eche'çharr notenes necartoŧ. Tarraña ñeñtpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñe'e' eche'çharr ne'ñorennasa. Ñeñto'marña te'pa' e'ñe neyoçhrocmañen o'ch notas, soçtape'cherr cohuen e'ñe tayecma allochñapa' ñerra'm esepoch neçherr seshopa' amach çha se'ñoratno eche'çharr. Tarro'mar ñerra'm ama soçtape'cherro cohuen, po'ñoçh ñerra'm esempo neçherr seshopa' çhach se'ñoraten eche'çharr, ñeñtes notene' napa' e'ño' nañeña noctapñoŧ atet es nepatse'tyen ñeñt atet pa'yena acheñenesha' arr patsro, ñeñtpa' e'ñe ñocueta sherben. Tarraña napa' ama attey'e nepeno.

³ Ñehua, ama't napa' nocrrena arr patsro atet yocrrena allohueney acheñey tarraña ñeñt atet nema'yoçhrena Yomporecop, ñeñtpa' ama atteyaye ñeñt atet ma'yoçhrena acheñenesha' arr patsro.

⁴ Tarro'mar ñeñt atet yema'yoçhrena Yomporecoppa' ñeñtpa' ama añeyaye ñeñt atet yocape'chen ya acheñey arr patsro. Añña atto yema'yoçhrena ñocop, e'ñe ña po'huamencoŧ atet yepena. Attochña yehuapore'toñ allohuen ñeñt epatare'tene' Yompor poçtapña.

5 Ñaña allohuen serrparñatsočno ñeñña epatare'tene' Yompor po'ñoñ ñeñtcha'ña yehuapore'tua. Ñaña allohuen cotapñatsočno atto nanac ommo'chenet, ñeñña ama muenatenahueto attoch enteret Yompor, ñeñtpa'cho'ña Yomporcha'ña po'huamencoť o'ch yehuapore'tue. Ñaña ñeñt allpon yoctape'chyen arr patsro ñeñña atpare'tatene' Yompor poctapña, ñeñtcha'ña ya'meta'huerr Cristesho, allochñapa' attochña Cristopa' o'ch ame'ñatera.

6 Ñaña ñerra'm o' alla name'ñatuerrsa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeñt atet atpare'tetsa.

7 Sapa' aña cohuen senten ñeñt allpon sentyen secloyot. Ñerra'm esesha' entetsa atet ñapa' Cristo mueñene', ñeñt acheñerpa' eñochepe' napa'cho'ña Cristoña nemñene'.

8 Ama't atarr natontaten neñoñ atto alla noterrser napa' Cristo puellsensaren, tarraña napa' ama çoye' neyllateno neñoñ attoch nepenca. Tarro'mar atto llesensa'n Yepartseshar Cristopa' ñeñtpa' añecopña attoch neyenpas attoch allo'na sesen huomenc pa'nmue' seyocher Yomporecop. Ñeñtpa' ama añecpayaye alloch na'puerrataterres ñeñt atto same'ñena.

9 Napa' ama nemno o'ch añcha'nochen sentenen e'ñe necartofa.

10 Tarro'mar patanta'ttsos atet sentennan necarta ñerra'mrrate' atarr eche'charroť es notenes ñeñt atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' sentenno ama't mamesha,

ñaña atto neserrpare'tatenespa' ama't e'ñe mameshapa' ama asherbenaye' senteñe.

¹¹ Tarraña acheñenesha' ñeñt atet otetspa' eñochetepa'ch ñerra'm erroť notas necartoť ama't atarr allaparo'tsenen atetcha'cho' po'ñoĥ nepennas ñerra'm esempoch neĥherr sesho.

Atto Yomporpa' ama pocteye' entenano acheñenesha' o'ch cohuen entenet e'ñe ñañeñeta

¹² Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocpueta. Napa' ama nemno o'ch not napa' e'ñe attecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta poctaṗñetpa' coshapretannenet e'ñe ñagattseta. E'ñe ñañeñeta poctaṗñetpa' cohuen entapretanna'tyenet, ñeñtṗa' atfa otatse'tyenet.

¹³ Tarro'mar yapa' ama yoyaye yocṗañña ñeñt atarr yocshapretannena. Añña Yompor poctaṗñña ñeñtṗa' allohua onañchareť yocop ñeñtcha' e'ñe cohuen yocshapretannena. Ñaña Yompor poctaṗñña ñeñt atet onañchennaypa' ñeñtṗa' añeĉpa'ñaña sherben attoĥ yeĥapatonas Yompor po'ñoñ e'ñe seshohuen ñeñtes corinto'marneshas.

¹⁴ Ñeño'marña yapa' ama ĥo yatontateññañe Yompor poctaṗñña tarro'mar ñeñt allpon onañchennay, ñeñtṗa' e'ñech allohua yetorrena ñocop. Ñeñtṗa' añeĉpa'ñaña sherben attoĥ yeĥapat Yompor po'ñoñ ama't seshohuen. Ñeño'marña ya ahuatṗa' yanom ĥapate' Yompor

po'ñoñ sesho ñeñtara añ cohuen ñoñets alloch yequeshperra e'ñe yame'ñeñoña Cristo.

¹⁵ Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratsa all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho.

¹⁶ Attochña ama't allpon anetsochno ñeñt allemeñ allo'tsa'yen ellonet seshotpa' allña nesechena ñaña allcha'ña neserrpare'tatiesosanet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tataretteneta' allochñapa' amach cha nommo'choñe po'psheñeñ po'taruas ñeñt ñanom serrpare'tats all.

¹⁷ Ñerra'm esesha' muenetseñ o'ch e'ñe cohuen eños puesheñarrocop tarraña ñeñtpa' Yomporecopcha'ña e'ñe cohuen eñen.

¹⁸ Tarro'mar añ acheñer ñeñt eñoretsa e'ñe cohuen ñocpapa' ñeñtpa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñtña e'ñe pocte' enten ña.

11

Atto ommoñātenesha'pa' ahuo't shequēnan corinto'marnesha' ñetpa' allsensare'teto'

¹ Napa' atarr nemneñ o'ch se'mñoton atto cha muene' atta es notatse'tyen. Po'ñoch o'ch notas, se'mñoton ñeñt atet es notatse'tyen, allochñapa' attoch neñotatas ñeñt atet noctape'chen.

² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patataretes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñeñ. Po'seññapa' o'ch o'patacha puesheñarr yacma ñeñtcha' puerrollar pa'. Ñapa' o'ch cohuanmpenan po'señ e'ñe cohuen tarrempohuach esempoch huapa ñeñt o'patenaya allempochña pomanña po'señ ñeñt ama a'pllareteyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñtcha' e'ñe serrollar sepa' ñapueñ.

³ Tarraña napa' cha sellcatenen. Napa' noten sapa' o'te' cha semnatena o'ch shecaset saña, atet pa' ahuañ shechep allempo shecan Eva tarro'mar ñeñt shecheppa' atarr etsotenan shequëñets. Ñerra'm sapa'cho'ña pueshquëñoñetaspa' añach yeçhatenset ñeñt ama cohuenayaye cotapñats, ñeñto'marña o'huañcha' allo'na sesen ame'ñenaya Cristo ñapueñ ñeñt e'ñe cohuen.

⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtpa' ama atteyaye ñeñt atet yeyçhatuas ya ahuañmo'cha, sañapa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ cotapñats ñeñtpa' ama añeyaye Yompor poctapña, sañapa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ

ñoñets alloch sequeshperrañ, ñeñt̃pa' ama añeyaye ñeñt̃ e'ñe cohuen ñoñets ñeñt̃ same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets.

⁵ Ñaña ñetpa' at̃ta ommo'chenet allsensareteto' Yomporeshot̃, ñetpa' atarro' sherbenet. Tarraña napa' elloña atarr asherben nentena.

⁶ Ama't napa' ama ayčhatareteno attoch neserrpare't cochneshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt̃ atet notenes ñeñt̃pa' e'ñe po'ñočh atet tarro'mar shonte' pa'namen norrtatyen erracmañen ñeñt̃ña e'ñe señotatene'.

⁷ Ñehua, sapa' amate' pocteye' sentenno tarro'mar ama't ahuañmo'chapa' ama čoye' necobraso atto neserrpare'tatensa' Yompor po'ñoñ ñeñt̃ alloch yequeshperra. Ñato' amate' asherbenaye' sentenno atto ama necobraso. Tarraña ñeñt̃pa' añecop sherben attoch sapa' o'ch tantaterres Yompor sosya'tsañoť allochñapa' o'ch puechemer perres saña.

⁸ Ñehua, po'poñ anetso all apčha'yenet pame'ñeñoťet Yompor, na errotenopa' čocma naguënanet ñeñt̃ allpon muenenet o'ch tsa'tnet e'ñe ñet poctapññoťet. Ñeñto'marña ama pallteno o'ch setsa'tna saña atto neserrpare'tatenes. Ñeñt̃ napa' atet nenteñ ñerra'mrrate' po'poñ anetso all apčha'yenet pame'ñeñoťet Yompor, napa' ahuo't neprratam̃psanet ñet attoch nesherb̃as sa.

⁹ Ahuañmo'cha allempo na'posa seshopa' ñerra'm esempo nanac es nepalltena, sapa' ama't puešeñarroťesapa' ama na'tsre'močhtana'taso

es senamare'te' ñeññ nepalltena. Tarraña allempo atarr es nepalltenapa' o' huačha'ta masheñnesha' Macedonioť, ñetñapa' o' aposnet allpon ñeññ atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'moçhtana'tasa ama't e'ñe puesheñarroťesa. Ñaña napa' çhocmach atet nepena.

¹⁰ Napa' neñotena Cristopa' entenen e'ñe po'ñoçh cohuen ñeññ atet nepena, ñeñño'marña napa' ama't eseshapa' amate' errotenoť queçhpatatnetoña atto e'ñe cohuen neserrpare'teññañ Yompor po'ñoñ e'ñe atta ñeññ allo atarr nocshena, ama't errařaren nesen Acayo'mar.

¹¹ ¿Eso'marte'ña atet notenes? ¿Ama't señoteñe? Chaťe' sotenapañ amate' nemorrentenso. Tarraña ñeñtpa' ama atteyaye. Yomporña nentene' atar-rcay'e nemorrentensa.

¹² Napa' çhocmach atet nepena amach necobrenso ñeññ atet pena po'potantañ ñeññ pommo'cheñoťeta serrpare'tatyenset. Allochña ñetpa' amach errotenoť otneto napa'cho'ña ahuo' na'tsrre'moçhtana'ch naña acheñnesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporecop.

¹³ Tarro'mar ñeññ atet acheñpa' ama Yompor-eye' llesensenaye, ñetpa' aña po'taruas penet shequëñets attoch ganenet e'ñe atta. Atta mueneñet o'ch po'poñetet ahuo'ch orrtet atet ñerra'm Cristo puellsensar.

¹⁴⁻¹⁵ Ñehua, yapa' yeñoteñ oneñetpa' çhocma atet pena ñaña o'ch po'poñet attoťcha' shequëney.

Oneñetpa' chocma orrtatennay ñeñtcha' cohuen yenten ya, o'ch orrtatennay atet ñerra'mrrate' ñapa' Yompor po'puetarenño' amñareñ ñeñt atarr cohuen. Ñeñto'marña yeñoteñ oneñet pueyochresha' ñeñt torretsa ñocoppa' ñetpa'cho'ña atarrcha' ashcañareret, mueneñet o'ch po'poñetet attotcha' orrtenet atet ñerra'm añ acheñer ñeñt e'ñe po'ño'ch torretsa Yomporecop. Tarraña ñeñt atet petsapa' añ o'patenahuet coñcheñets ñeñt poctetsa añecop ñeñt atet patse'tyetsa.

Atto Pablopa' pa'namenot muerochtateñet e'ñe pame'ñeño' Cristo

16 Ñehua, te'pa' o'ch alla noterrser. Amach sentatsetno napa' attate' notatse'tyen. Ñehua, ama't sentenen atet ñerra'm otatsñaatenpa' notatse'teño'ñapa' se'mñoten. Tarro'mar napa'cho'ña o'ch e'ñe cohuen neños ñeñt e'ñe nocpa atet ñerra'mrrate' cho nommo'chena mame'.

17 Ñehua, ñeñt atet notenes te'pa' ama cohue-nayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatse'teño' e'ñe cohuen neñen ñeñt e'ñe nocpa atet ñerra'mrrate' cho nommo'chena. Tarraña ñeñt atet notenes neñoteñ ñeñt'pa' e'ñe po'no'ch netsotueñ.

18 Atto shonte' po'potantañ ommo'chyenat ñeñt atet etsotenet ñet arr patsro, napa'cho'ña o'ch neñosatse'tapretyesamet atet ñerra'mrrate' cho nommo'chapretyenanet.

19 Sapa' e'ñe atet sentena sañeña atarro' es señoten ñeñto'marña e'ñe pocte' senteñ

o'ch se'mñoteññañ ama't otatsñañ ñeññ atto ommo'chena.

²⁰ Ama't ñet atto pomnaren penset, sañapa' e'ñech pocte' senteñ. Ama't es puerratamñpsaset ñeññ allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teñoñetaspá sañapa' e'ñech pomnaren sepatena. Ñerra'm esempo ama't cho taclapechenset, sañapa' e'ñech pocte' senteñ atto atarr pencna'ntatenset.

²¹ Napa' ama nepenquëñoñeye' notenso, napa' ama nemno nehuamenco'tpa' o'ch pomnaren nepenes, atet penes po'potantañ.

Ñehua, tarraña ama't errotente' ommo'chyenetpa' napa'cho'ña o'ch atet neñosatse'tapretyesamet. Notatse'teño'tpa' chach nottena atet ñerra'mrrate' cho nommo'chapreteña ommoñañenesha'.

²² Ñetpa' pommo'cheñoñetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan naña. Ñetpa' pommo'cheñoñet otenet israelena'tareto'. Ñehua, napa'cho'ña o'ch notas israelena'taren naña. Naña ñetpa' otenet po'mñrenñaneto' yatañ Abraham. Ñehua, napa'cho'ña po'mñrenñen yatañ Abraham.

²³ Ñetpa' pommo'cheñoñet otenet ñetpa' atarro' torrenet Cristocop. Ñehua, napa'cho'ña elloña atarr nanac ne'torrena Cristocop. Ama't e'ñe notatse'teñoña noten, ñeññpa' e'ñe po'ño'ch atet. Ama't allpon torrenet ñet, elloña napa' atarr nanac ne'torrena na. Naña ama't allpon amue-rochtataretetyenet ñet elloña napa' atarr nanac

amuerdohtatareŧen. Allpon ayottam̄psareŧen all coñchatennet, ñeñt̄pa'cho'ña nanac atonoche'tats. Ñaŋa allpon ashtennetpa' ñeñt̄pa'cho'ña atarr nanac atonoche'tats. Ñaŋa ñeñt̄ allpon aut-sancha' rromuetseñ, ñeñt̄pa'cho'ña atarr nanac atonoche'tats.

²⁴ Ñaŋa judionesha' e'ñe pue'moñe'teñoŧetan napa' atet̄ ashtennet e'ñe amnaroche'tats. Allempoña ashtennetpa' ma'poch čharra' puechena es-con ñeñt̄ atto pacapacatspennet.

²⁵ Ñaŋa ellonetpa' o'chčo' alla nallerrneterr ñaŋa tsachpo, e'ñe ma'poche'ttsoema nallennet. Po'pocheño'pa'cho'ña parrochpa' o'cho' alla rrolle'terrneterr. Po'pocheño'pa'cho'ña allempo nesen noñto sapo'marpa' alla nepotam̄perrerr ma'poche'ttsoema. Allempopa' alla narepen alla nellapen oño enopa'rrtatsa.

²⁶ Napa' čhocma nechopeñe'chyen ellařar allo'tsa'yen pa'namen ñeñt̄ atarr am̄cha'nočhenare', atet̄ ñerra'm allempo netam̄pena noñto oño'mar, ñaŋa allempo nečhap all am̄cha'nočhtena eñečhno, ñaŋa allempo am̄cha'nočhtana'tenen namo'tsesha' ñaŋa po'poñ ačeñ ñeñt̄ ama judioneshayaye. Ñaŋa ñeñt̄ am̄cha'nočhetyetsa all anetso'mar, ñaŋa ñeñt̄ am̄cha'nočhetyetsa all puetsato'mar, ñaŋa ñeñt̄ am̄cha'nočhetyetsa all oño'mar. Ñaŋa ñeñt̄ atto am̄cha'nočhtena po'potantañ ama't otenetañ masheña' țarraña ama masheñeyayeto, ñetpa' ama ame'ñeñeto Yompor.

²⁷ Elloña čhocma atarr netaruasen, ñaŋa shonte' ñeñt̄ atarr echarr nentyen. Ñaŋa

atonoche'tats atarr nanac na'huanten nemoñ torratsa Yomporecop. Ñaña epaye' nemueroçhtena nachporrñoť, ñaña no'ñpañoť tarro'mar ama eñalle ñeñťcha' nerren ñaña ñeñťcha' norren. Ñaña epaye' mueroçhtatenen senet tarro'mar ama eñalle neshtam ñeñťcha' nechorra, o' e'ñe neptsapesua.

28 Ñaña ellonet napa' çhocma nellquëña ñeñť pame'ñeñoťet allemeñ apçha'yetsa. Napa' aña'ñaña çhocma nellcatene' ñeñť atarr torrapo' nentyen pa'namen.

29 Ama't erra'tsena acheñer ñerra'm ama huomencaye' penano pueyoçher Yomporecop, nañapa' atarrcha' nellcapreteña. Ñeñťña atet nellcapreteña nañapa' o'ch atet ne'muen neyoçhro ñerra'mrrate' o'huañ huomenc neña' neyoçher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñť ama pocteye' enteno Yompor, ñaña nepencapreteñoťpa' ama't mameshapa' amach pocteye' nenteñe.

30 Ñato' te'pa' o'ch noterrser po'poñoneť cotapñats. Sapa' po'ñoçh señosatse'tatyenen cohuen ñeñť e'ñe nocpa. Añña cohuen nenten attoch neños cohuen ñeñť e'ñe nocpa, ñeñťpa' atto ama ahuamencaťoyenaye' entenno acheñenesha'.

31 Yomporpa' eñotenen ñeñť atet notenes, ñeñťpa' ama shequëñťsoyaye. Ñeñťara Yompor ñeñť Pompor pen ñaña Yepartseshar Jesucristo ñeñťcha'ña ya'ye'choçhtaterr tayoteñ errponohuañen.

32 Ñehua, napa' o'ch neyerpatasa atet apareten

ahuañmo'cha allempo Damasco'tsenen. Ñehua, ñeñt̃ añcha'tarettatset̃ all Damasco, ñeñtpa' ñeñt̃ara añcha'taret̃ Aretas pueyochresha'. Ñeñt̃ña nene'ña guardianesha' ñeñt̃ camretsa allemeñ yetarroṭ. Ñetpa' añecop camrenet attoch rroma'netañpa' o'ch yottam̃pesnetañ allcha' coñchatnetañ.

³³ Tarraña napa' arr esha'tnet cañtro attoña čha'nmaterrnet ventanoṭ allotña a'suatañperrnet cončhtot. Attoña e'ñe cohuen nequeshperra, ñeñto'marña ama eshcaye' rroma'noña guardia.

12

Atto Pablopa' a'tapataretta Yompor pue'ntaño ñeñt̃ e'ñe poma'ptaño hua

¹ Ñeñt̃ atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neserrpare'taterrser atto Yepartseshar ñaña es negatyene' ñeñt̃ña es neñotatyene'.

²⁻³ Ñehua, napa' neñoteñ na puesheñarrana ñeñten ame'ñenaya Cristo te'pa' o' met čharra' puechena pa'tats char, allempoña napa' a'tapaten Yompor pue'ntaño ñeñt̃ e'ñe poma'ptaño hua. Napa' ama neñoteñe, ñato' orate' nechtso a'tapataret̃en, amapa' ñato' necamquëñoñate' a'tapatnet. Ñeñtpa' Yomporña eñotene'. Napa' e'ñe neñoteñ po'ñočh a'tapataret̃en Yompor pue'ntaño all atarr nanac cosheñtso'tsa'yenet.

4 Ñoñets ñeñt̃ ne'muena' allpa' ama aserrpare'teno tarro'mar ya arromñaŕey ama pocteyaye o'ch yeserrpare't allo.

5 Ñeñt̃ atet aŕareteneñ allempo, ñeñt̃pa' e'ñe poctet̃ o'ch cohuen neñoseñ e'ñe nocpa, tarraña amach atet neŕatsto, añachña nocshena atto ama ahuaencatoyenaye' entenno acheñenesha'.

6 Ñehua, ñeñt̃ atet aŕareteneñ allempo ñeñt̃pa' e'ñe poctet̃ o'ch cohuen neñoseñ e'ñe nocop, ñeñt̃pa' ama čoye' notatse'teno, tarro'mar ñeñt̃pa' e'ñe po'ñočh atet aŕareten. Tarraña napa' ama nemno o'ch cohuen neños e'ñe nocpa. Añachña nemnen ñeñt̃cha' cohuen entapretennet ñeñt̃ e'ñe allpona entapretennet ñeñt̃ atet es neŕa'yen cohuen ñaña ñeñt̃ e'ñe allpona e'mñotapretennet ñeñt̃ atet e'ñe cohuen neserrpare'ten.

7 Atto Yepartseshar ñaña es negatyene' ñeñt̃ña es neñotatyene' ñeñt̃pa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñt̃ña atarr nemueročhtatame'tene' nanac. Ñeñt̃ atto nanac nemueročhtena, napa' atet nenteñ ñerra'mrrate' aj nechtsotam̃pena ñeñt̃pa' oneñeteshotña huennana ñeñt̃ña atarr atserr nepene'. Attoña Yomporpa' ama muenatenno o'ch nocshena e'ñe nañeña.

8 Napa' o' ma'poche'tats nenamueñ Yompor a'huañañperrnepa' ñeñt̃ atarr nemueročhtatene'.

9 Tarraña ñapa' ahuo't otenen: "Amach na'huañañŕsatsterrpe, tarraña napa' atta čocma atarr nemuerenŕa, ŕapa' ñeñt̃aña pepalltena.

Tarro'mar ñeñt' ama eñalle e'ñe ña po'huamencpa' ñeñt'cha'ña orrtatene' na nehuamenc." Ñeñt'pa' atet' otenen Yompor. Ñeñt'o'marña atto napa' ama eñalle e'ñe na nehuamenc, ñeñt'pa' ñeñt'ña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt' nechorrenaya; ñeñt'ña norrtatenpa', ama noyaye nehuamenc, ñeñt'pa' Cristo.

¹⁰ Ñeñt'o'marña napa' añ atarr nocshatene' atto napa' ama ahuamencatoyenayayno ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt' allpon atarr echarrare' nentyen, ñaña atto chocmach cotare'tennet, ñaña ama't allpon ñeñt' nehuenoya ñeñt'ña atarr nocshatene'. E'ñe pocte' nenteñ o'ch nemueroçhta Cristocop. Tarro'mar neñoteñ ñerra'm esempo ama ahuamencatoyenaye' yenteno e'ñe ya, allempoña Cristopa' ahuamencat peney.

Atto Pablopa' atarr llequënana cor-into'marnesha' ñeñt' ame'netsa

¹¹ Sapa' atto señosatse'tatyenen e'ñe cohuen ñeñt' e'ñe nocpa, tarraña ama't atteñpa' napa' e'ñe po'ñoçh notatse'tyen, tarro'mar napa' ama nepallteno o'ch neños e'ñe cohuen ñeñt' e'ñe nocpa. Añña palltetsa sa o'ch señosapreten cohuen ñeñt' e'ñe nocpa. Tarro'mar sapa' señotenen atarr asherboyenen. Ama't po'potantañ ñeñt' atarr se'mñotatene' atarr ommo'chenetañ, ñetpa' allsensarefeto' Yomporeshot, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno.

12 Tarro'mar ahuañmo'cha allempo na'puena sesho, napa' allña norrtatyesonas Yompor po'huamenc ñeñt atarr echarrare' ñeñt sapa' ama't ahuañapa' ama sentare ñeñtcha'ña señotate' ñeñtpa' Parets po'huamenc ñaña ñeñtcha' señotate' napa' po'ñoçh Yomporña nellsensene'. Ñeñto'marña e'ñe cohuen na'huantennas ñeñt atarr torrapo' sentyen.

13 Attecma es norrtatyennas ñeñt atet neña'yes po'potantañ ñeñt pame'ñeñoñet apcha'yetsa allemeñ anetso'mar. Añña ama na'tsrre'moçhtana'taso es senamare'tyese'. Tarraña ñerra'm ama pocteye' sentono ñeñt cohuenare' neponaspa', ñehua, ñato' o'ch sepreñnerren.

14 Te'pa' poma'pocheño'pa' o'ch ahuernerr sesho. Attecmach neño'huerrerr, amach na'tsrre'moçhtana'taso es senamare'te' ñeñt nepalltena na. Tarro'mar napa' ama añeye' ne'nen ñeñtcha' es sapuen na; napa' añña nemnen o'ch sepomhua sañeña Cristesho. Tarro'mar napa' atet nentenes ñerra'mrrate' po'ñoçh e'ñe nechemer nepenes. Ñehua, cheshaneshapa' ama añeye' pallteneto o'ch es a'yapachet ñeñtcha' añño'tet pamo'mtayecop. Añña nanac palltetsa, pamo'mte'chña es a'yapachets ñeñt puechemereshacop.

15 Ñeñto'marña e'ñe nocsheñsha' o'ch nepomhua e'ñe nañeña ñeñtpa' e'ñech socop. Allochñapa' attoch sequeshperra samña. Ñaña allpon nechyen, e'ñe nocsheñsha'pa' o'ch nepomyeñ e'ñe socop. Ama't napa' elloña

atarr nemorrentensa sañapa' o'huañ e'ñeye' semorrentenna na.

16 Sapa' señotenen napa' ama na'tsrre'moçhtana'taso es senamare'te' ñeññ e'ñe nocop. Tarraña sapa' çate' sotenapañ napa' atarrte' neñoteñ attoch neshcare'tas ñeññ e'ñe po'poñe'tt socma shecare'teñets.

17 Ñeññ nemña ahuañmo'cha epsheña sesho, çate' sotenapañ ñeññpa' tarrecpate' attoch shecare'taset.

18 Ñehua, na te'pa' o' nesechach masheñ Tito ñeññcha' tatsa sesho, epuet po'psheñeñ masheñ o' nemñanet epsheño'maret sesho. Sapa' çate' sotenapañ masheñ Titopa' o'ch shecare'tensa'. Ama't señoteñeña yapa' attecma cohuen yocape'chen yeyoçhro epan masheñ Tito ñaña attecma es ye'pa'yennas e'ñe cohuen.

19 Sapa' çate' sotenapañ añecpate' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteño'es masheñeshacha' ñaña noçhaneshacha' o'ch notas, ñeññpa' ama nocpayaye. Añecopña notenes ñeññ e'ñe socop allochñapa' o'ch alla huomenc seperr seyoçher Yomporecop. Napa' e'ñe neyemteño'f Cristo, Yomporñapa' entenen ñeññ atet notenes.

20 Tarro'mar e'ñe nellquëño'es sa noten, ñato' esempoch neçherr sesho, ñerra'm attera nentyesuerrserr ñeññ atet se'patse'tyena, napa' ñeññcha'ña atarr nellcatuerrayerr sesho. Attoña ñerra'm sentapuerren nellquëñesha' neçherr seshopa' ñeññcha'ña sellcate' samña. Ñato' o'ch nentuerrserr attera se'moñe'tannena,

attera es seye'chapretannena, attera sa'tsrre'mare'tatannena sañeña attoch o'ch sa'mcha'taretta; ñato' attera sesasare'tanna'tyena, attera sa'metare'tam̄psannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teñoŋpa' seche'chame'tanna'tyena.

21 Ñaña napa' nellquëñoŋes sa noten, ñerra'm esempo neçherrerr sesho po'pocheñoŋpa' ñato'rraña o'te' alla pencna'ntaterrnerr Yompor e'ñe so'mara. Tarro'mar ñato' patanta'ttsos ama sequeçhpueno ñeñt̄ ama pocteye' enteno Yompor ñeñt̄ atet seyçha'yen sa sosya'tsañeçhno, ñaña atto seçhta'yeñ coyaneshaçhno ñeñt̄ ama seŋaporeyaye, ñaña coyanesha'pa'çho'ña aguënan yacma ñeñt̄ ama puerrollareyaye, ñaña atto sayom̄atse'tyena ñeñt̄ po'ñoçh ama atet aŋapahuoyaye. Ñato' attera seŋatse'tyena atet sepe't̄ ahuat̄ ama llecatensoña so'chñar attoch soçtape'cherr etserra cohuen. Ñeño'marña ñerra'm esempo neçherrerr sesho ñerra'm attera nentuerrerr, nellquëñoŋpa' çhate' neya'na'tuerres.

13

E'ñe allohuanen atet cotape'chatyesnerranet pa'namen esocmañen

1 Ñato' poma'pocheño o'ch alla ahuer-rnerr sesho. Ñaña o'ch notas po'poñ, ñeñt̄ otteñe'charettetsa, ñerra'm epsheña a'metare'tam̄pene' amapa' ma'psheña,

allempopa' pocte' o'ch ye'mñnoch ñato' po'ñochte' atet p̄atse'tyena.

² Ahuañmo'cha allempo puepocheño necherr sesho, ñeñt̄ attera p̄atse'tyetsa ñeñt̄ ama pocteyaye, napa' o' notuanet allempo ñeñt̄cha' atet āparettet ñerra'm atteretach. Ñehua, te'pa' necarto'pa' o'ch alla noterraneterr ñet, ama't e'ñe allohuenes o'ch notas, ñerra'm esempo necherrerr po'pocheñopa' o'ch ne'ñotare'tuerres allohuenes ñeñtes attera p̄atse'tyetsa.

³ Allochñapa' sapa' e'ñech seño tuenen po'ñoch nach eñorostsa ñeñt̄ atet muenatenen Cristo. Ñehua, ñeñt̄pa' tarro'mar sapa' chocma senamuenen o'ch norrtatennasa' attoch señoten napa' po'ñoch Cristo ne'ñoratene'. Ñaña Cristopa' e'ñe po'huamencotña chocmach erroten es p̄a'yennas, ñaña atarr ahuamencat penes.

⁴ Ñehua, po'ñoch yeñoteñ allempo corso'tam̄pset Cristopa' ama ahuamencateye' enteñeto tarraña Pomporña e'ñe po'huamencot alla tantater. Yapa'cho'ña attecma yeñotena ama ahuamencateye' yenteno ñerra'm ña, tarraña te'ña yapa' o' yocrrerra po'huamencot Yompor attey ñerra'm ña. Attoña po'huamencot Yompor e'ñe cohuen yesherbenes.

⁵ Te'pa' o'ch noterrserri, socoppa' añ poctetsa o'ch señota sañeña, ¿po'ñochte' same'ñena? O'ch señota esheccha' seño ch po'ñochte' sapa' same'ñena. Ama't seño teñe Jesucristoña sechorrenaya. Ñehua, ñerra'm po'ñoch ama same'ñeño, amachña errotenot chorraso.

⁶ Tarraña napa' chocma necuenes o'ch

čhaponasa seyočhro attochña señoten po'ñočh napa' añ nellensene' Yompör.

7 Napa' nema'yocheñoťpa' čhocma nenamuennas Yompör socop attoch amach allo'na atet seřatsto ñeñť ama cohuenayaye Yompörecop. Ñeñťpa' ama añecpayaye attoch sapa' o'ch señotenen napa' po'ñočh allsensareten Yompöreshot. Añecopña nenamuennas Yompör socop attoch sapa' čhocmach seřa'yen ñeñť cohuen enten Yompör, țarro'mar ñeñťpa' ñeñťña e'ñe cohuentetsa Yompörecop. Ñeñťpa' atetña nemnen socop ama't napa' atet sentennoñ atet ñerra'mrrate' ama allsensareteno Yompöreshot.

8 Tarro'mar napa' ama nemno o'ch nepatare't ñeñť e'ñe po'ñočh cohuentetsa Yompörecop. Napa' añña atarr nemnen o'ch nepatuahuoñ ñeñť e'ñe po'ñočh cohuentetsa ñocop.

9 Ñerra'm soctape'cherr cohuen attochña huomenc seperr seyočher Yompörecop amach nepallteno o'ch norrtatonas nehuamenc atto allsensareten Yompöreshot. Tarraña atetpa' e'ñe pocte'. Ama't napa' ama ahuamencatoyenaye' sentenno, țarraña ñerra'm sapa' ahuamencat perres Yompör, ñeñťpa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc řa'nmue' seyočher Yompörecop.

10 Ama't ellařaro'tsenen o'ch nequel-lquërrnaserr necarta, ama't ama nesena' sesho, allochñapa' o'ch alla soctape'cherr cohuen Yompörecop. Attochña ñerra'm esempo nečherr seshopa' amach čha muene' neche'chame'tyesuerrso attoch señoton ñeñť

atet llesensenen Yepartseshar. Tarro'mar atet allsensareten, ñeñtpa' ama añecpaye' sherbeno alloch na'puerratatuerres, ñeñtpa' añecopña sherben attoch neyenpas huomenc pa'nmue' seyocher Yomporecop.

Arrpa' all e'ñe poctacma so'tnerranet po'cartot

¹¹ Te' masheñneshacha' ñaña nochaneshacha' allohuach notas añ necartot. E'ñe neso'teñoťespa' o'ch notas, Yomporepa'chña sa'nataya. Te'pa' ñeñtach noterrser mame'. Allo'nepa'chña sesen cotape'chnomue' ñeñť e'ñe cohuentetsa Yomporecop. Ñeñť atto o' noctape'chaterrser añ necartot, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñťara Yompor ñeñť atarr amorrentña ñeñťña atarr yocshatene' yeyochro.

¹² E'ñe semorrentanna'teñoťpa' atetcha' sehuomńcha'tanna'tena ñeñť atet poctetsa Partsocop.*

¹³ Ñaña arrpa' allohuen ñeñť o' pueyochresha' perr Parets, ñetpa' mueneñet o'ch huomńcha'taset ñamet arr necartot.

¹⁴ Yepartsesharepa'chña Jesucristo seben-sare'tampene' allohuenes, ñaña Yomporepa'chña semorrentaya attoch semorrentannena saña, ñaña Puecamquẽñepa'chña sechorrenaya attoch e'ñe separrocmatuahua allohuenes epas Cristo.

* **13:12** Po'ñočh oteneý, "E'ñe semorrentanna'teñoť čoch setso'ttsa'pa'tannena ñerra'm esempo sehuomńcha'tanna'tena ñeñť atet poctetsa Partsocop." Ñeñťpa' atet yečhete't ahuat.

Te'pa' ñeñtach notas, ñeñtpa' attetepa'chña
Nompore. Allohua.

Pablo

**Yompōr Po'ñoñ ñeññ attō Yepartseshar
Jesuscristo e'ñe etserra a'pōctaterrnay
Yompōresho
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

fa985bb4-fad0-5968-9ee4-626b89cba24f